

Նա գրկեց ինձ եւ սկսեց երեսս համբուրել:

– Դէ՛, հիմա գնայ ինչ «հոգու բաժին» որ ունես, բոլորը բեր, դրանք քաղցած են:

Երեցկինը մի թեթեւ ժպիտ գործեց փոքրիկ երեսի վրայ եւ դուրս վազեց: Երեւում էր, նա շատ ուրախ էր իր հիւրերով, եւ գնաց մեզ համար նախաճաշիկ պատրաստելու:

«Գիժը» փոքր առ փոքր սկսեց ինձ դուր գալ. նրա առաջին ժանտութիւնը, որ ինձ վրայ վատ տպաւորութիւն գործեց, կարծես թէ անցաւ, եւ նա երեւում էր ինձ մի մարդ չափազանց պարզ եւ բարեմիտ:

Ասլանը հարցրուց տերտերից, թէ որտե՞ղ են պահուած իր «իրեղէնները»: Նա ցոյց տոռեց մի ուրիշ սենեակ, եւ Ասլանը առանց առաջնորդի մտաւ այնտեղ: Ես մնացի տեր հօր հետ մենակ:

– Կարդացե՞լ ես, – հարցրուց նա ինձանից:

– Կարդացել եմ, – պատասխանեցի ես:

– Ու՞մ մօտ:

– Մեր թաղի քահանայի, տեր Թողիկի մօտ:

– Զասկացա...: Դեռ չե՞՞ սատկել այն աւազակը:

– Մտում է, – պատասխանեցի ես: – Բայց դուք որտեղի՞ց էք ճանաչում նրան:

– Ո՞վ չէ ճանաչում այն անպիտանին. նա Դատոանի «գզիրն» էր, էլ չարութիւն չթողեց, որ չգործեր: Վերջը «ռեսին» սպանեց, փողերը կողոպտեց, փախաւ, եկաւ Սալմաստ, այնտեղ անունը փոխեց, եւ ասաց, թէ անապատի ճգնաւորեմ, այսպիսով քահանայ դարձաւ. հիմա սկսել է կախարդութիւններով ժողովրդին խաբել: Այդպէս չե՞՞:

Այս խօսքերը լսելով, ես բոլորովին զարմացայ:

– Դու ինչպե՞ս պրծար նրա ձեռքից, – հարցրուց ինձ:

– Փախայ նրա ուսումնարանից:

– Խելացի բան տեսար: Երանի՛ թէ Կարօյի հետ փախած լինէիր. հիմա մի օրինաւոր մարդ դարձած կլինէիր... Ա՛խ, թէ մի անգամ ձեռքս կընկներ այն անպիտանը....

– Ի՞նչ կանէիք, – հարցրի ես ծիծաղելով:

– Ի՞նչ պետք է անէի, իր հանգուցեալ հօր մօտ կուղարկէի...